

2014-mi eqqumiitsuliornermut piorsarsimassutsimullu periusissiornerup nangingneqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq, Debora Kleist, Inuit Ataqatigiit)

Akissuteqaat

(Ilinniartitaanermut, Kultureqarnermut Ilisimatusarnermut Ilageeqarnermullu Naalakkersuisoq)

1. Siullermeerneqarnera

Inatsisartuni ilaasortap Debora Kleist, Inuit Ataqatigiit, 2014-imi eqqumiitsuliornermut piorsarsimassutsimullu periusissiornerup nangingneqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuummik saqqummiussineranut Naalakkersuisut qujapput.

Siunnersuuteqartup 2014-imi Naalakkersuisut eqqumiitsuliorneq piorsarsimassuserlu pillugit isumasioqatigiissitsisimanerat innersuussutigaa, tunngavilersuutiminilu allalluni sulineq tamanna aamma isumasioqatigiissitsinermi angusat 2014-imi qinersisoqarnissaata suaarutigineqarnerani unitsinneqarsimasut.

Naalakkersuisut sammineqartoq taannna pillugu Inatsisartuni ilaasortap Peter Olsenip Inuit Ataqatigiinneersup 2016-imi § 37 naapertorlugu apeqquteqaataanut nr. 069-imut akissutit innersuussutiginiarpaat.

Eqqumiitsuliornerup piorsarsimassutsillu iluini periusissaq inatsisit nutaat pingasut aqutigalugit nassuiaaffiginiarlugu Naalakkersuisut toqqarsimavaat, tassalu: eqqumiitsuliorneq pillugu inatsit, piorsarsimassuseq pillugu inatsit aamma timersorneq timigissarnerlu pillugit inatsit. Naalakkersuisut tunngavissat pingaernerit aalajangiiffigissavaat, kisiannili eqqumiitsuliornerup piorsarsimassutsillu iluini akulerunnaveersaarnissaq kissaatigalugu, taamaaliornikkut sammisassat sorliit pingaartinneqarnerussanersut naalakkersuinikkut aalajangiiffigeqqunagit.

Eqqumiitsuliorneq pillugu inatsit nutaaq eqqumiitsuliornermik suliallit kissaatigisaat tunngavigalugit suliarineqarpoq, Naalakkersuisullu isumaqarput inatsit eqqumiitsuliornerit atugarisaannut pitsanngoriaataajumaartoq. Inatsisit nutaat malitseqartillugit eqqumiitsuliornerit assigiinngitsut iluanni nalunaarutissat suliarineqassapput. Tassani atuakkiorneq pillugu nalunaarummik Naalakkersuisut aallarniuteqarniarput.

Naalakkersuisut ataatsimut isumaqarput eqqumiitsulioriaatsinut assigiinngitsunut tunngatillugu periarfissaqarluartoq, inatsisinilu tunngavigineqartut nutarteriffiginissaanni eqqumiitsulioriaatsit iluanni pitsanngoriaatinik kinguneqarumaartut.

2014-imi maajimi isumasioqatigiinnermi inerniliunneqartut aamma misilittakkanik allatigut katersinerit eqqumiitsuliornerup piorsarsimassutsillu iluini naalakkersuisoqarfiup sulineranut ilaalereersimapput.

Tamatuma saniatigut qanoq iliorluni tapiissuteqartarnissap aqunneqarsinnaanera pillugu Naalakkersuisut misissuillutik aallartereersimapput.

Naalakkersuisut naalakkersuisooqatigiinnissamik isumaqatigiissutaanni aamma taaneqarpoq: "taamaammat Naalakkersuisooqatigiit siuttuunermini kulturikkut ingerlatsineq suliassallu pillugit nassuiaammik suliaqartitsinissaq siunniuppaat". Nassuiaat taamatut isikkulik kingusinnerusukkut suliarineqarumaarpoq, tassa allaffissornikkut najoqqutassat nutaat atuutilereerpata aamma taakkununga suliniutinullu nutaanut nalilersuisoqareerpat.

Taamaammat Naalakkersuisut taamatut oqaaseqarlutik allannguutissatut siunnersuut tullinnguuttoq saqqummiuppaat:

Eqqumiitsuliornerup piorsarsimassutsillu iluini suliniutinik nutaanik isiginnittumik immikkoortunut periusissatut isikkulimmik nassuiaammik suliaqaqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, taakkunungalugu ilanngullugit inatsisinik nutaanik suliniutinillu nutaanik allanik nalilersuinissaq.

Naalakkersuisut taamatut oqaaseqarlutik allannguutissatut siunnersuutip akuerineqarnissaa inassutigaa.